

Hier is die uittreksel van Huisgenoot 18 Maart 2010. Vir Nick en Lorna se persoonlike getuienis luister na die MP3 onder http://dieakker.co.za/download_preke.php.



Nick en Lorna en hul dogters, (van links) Tenieka (4), Kiara (18 maande) en Miré (7).

Tien senutergende dae nadat die SuperSport-klankman Nick Greyling deur Nigeriese rebelle gyselaar geneem is, is hy en sy vrou, Lorna, eindelijk weer in Johannesburg herenig. Nick was fisiek en emosioneel te uitgeput om met ons te praat, maar kort tevore het Lorna eksklusief vir LUCIA SWART-WALTERS vertel hoe die hele drama ontvou het.

Toe die internasionale nommer op haar selfoon-skerm verskyn, het sy geweet: Dié oproep gaan haar lewe verander. Al het Lorna Greyling toe al byna 24 uur lank geweet haar man, Nick, is deur rebelle-groepe in Nigerië ontvoer, was daardie eerste oproep

en sy pleitende stem aan die ander kant steeds 'n skok wat sy nooit sal vergeet nie.

"Liefie, hulle soek geld. Hulle gaan my skiet. Asseblief, asseblief," het Nick gesmeek, en toe gaan die lyn dood.

Haar bene wou onder haar invou, en sy het in 'n tuinstoel inmekaargesak.

Toe Nick minute daarna weer bel, het die vierjarige Tenieka die foon voor haar weggeraap.

"Pappa, Pappa, gaan die skietters jou skiet?" het sy ontsteld gevra.

Nou, presies 'n week later, glimlag Lorna deur die tranes wat steeds kort-kort kom. Haar man is vrygelaat en oor enkele ure sal sy weer in sy arms wees.

"Woorde kan nie beskryf hoe bly ek is dit is verby nie," sê sy. "Ek is ongelooflik dankbaar. Die Here, my vriende en my familie het my hierdeur gedra. Ek sal nooit genoeg dankie kan sê dat my man vrygelaat is nie."